

Dr M: Ezam mungkin landasan Anwar masuk Umno
Malaysiakini.com
May 31, 2008
Muda Mohd Noor

Mantan perdana menteri, Tun Dr Mahathir Mohamad berkata, kemasukan bekas ketua Angkatan Muda Keadilan (AMK), Ezam Mohd Nor ke dalam Umno mungkin menjadi landasan kepada Datuk Seri Anwar Ibrahim untuk kembali kepangkuan parti itu.

"Dalam politik segalanya mungkin. Apa yang tidak disangka terjadi, boleh terjadi.

mahathir satria talk 310508 talk "Anwar sedar untuk menjadi perdana menteri ia memerlukan sokongan dari Umno.

"Anwar mahu masuk Umno kerana beliau mahu menjadi perdana menteri," katanya ketika menyampaikan ucapan dalam majlis suntikan semangat satria di Petaling Jaya hari ini.

Panelis di majlis tersebut ialah exco Pemuda Umno, Datuk Sazmi Miah dan bekas pengerusi kelab penyokong kerajaan di Parlimen, Datuk Ruhani Ahmad.

Sehubungan itu, kata Dr Mahathir, Umno perlu berhati-hati dengan kemasukan Ezam, terutama pada waktu sekarang.

Sementara itu, ketika bercakap dalam sidang media kemudiannya, mantan presiden Umno itu dengan sinis berkata, Umno terdesak untuk mendapatkan sokongan dari rakyat.

Rela dipecat

"Ambillah (pengerusi DAP) Karpal Singh, (Datuk Seri) Anwar (Ibrahim) dan menteri besar Perak sebagai ahli. Karpal Singh terutamanya boleh jadi ahli bersekutu," tambahnya.

Dr Mahathir juga berkata, beliau rela dipecat dari jawatan penasihat beberapa agensi kerajaan

"Tetapi kalau dia suruh berhenti saya berhenti tetapi suka jika ditendang," katanya.

Dr Mahathir menjadi penasihat kepada Petronas, Proton dan Lembaga Pembangunan Langkawi dan Tioman.

"Saya tidak bergantung kepada itu. Saya lebih suka mereka tendang," katanya lagi.

Ketika diminta mengulas tindakan kerajaan menasihatkan anaknya, mahathir satria talk 310508 pc Datuk Mokhzani supaya melepaskan jawatan pengerusi Litar Antarabangsa Sepang (SIC), Dr Mahathir berkata, beliau tidak mahu mengulas.

Jika mahu pecat, pecatlah. Jika mahu berhenti, berhentilah," katanya lagi.

Mantan perdana menteri sekali lagi menegaskan, beberapa pemimpin boleh menggantikan Datuk Seri Abdullah Ahmad Badawi sebagai perdana menteri dan presiden Umno.

MT, Kabinet tidak berkesan

Dr Mahathir berkata, mereka ialah Datuk Seri Mohd Najib Tun Razak, Tengku Razaleigh Hamzah, Tan Sri Muhyiddin Yassin dan Datuk Seri Rais Yatim.

"Kita tidak boleh beri kepada satu orang kerana bila dia seleweng kita tidak boleh tukar," katanya.

"Pemimpin yang terlalu berkuasa dia membelakangkan benda-benda ini sehingga ada tingkat empat," katanya lagi.

Dr Mahathir berkata, sebab itu beliau menyokong cadangan mewujudkan cadangan majlis penasihat kepada perdana menteri.

Katanya, Majlis Tertinggi (MT) Umno dan kabinet sudah tidak berkesan lagi untuk memberi nasihat kepada perdana menteri.

Dr Mahathir juga menegaskan beliau tidak menubuhkan parti lain setelah keluar dari Umno 19 Mei lalu.

"Ini kali kedua saya jadi mantan ahli Umno. Masa dipecat dahulu saya pernah naik ke pentas PAS tetapi saya bercakap mengenai Umno.

"Kalau orang tak mahu dengar ucapan saya tak apalah, cukuplah 22 tahun saya menjadi perdana menteri.

"Kita nak buat pertandingan, siapa yang menjadi perdana menteri paling lama dan perdana menteri yang paling singkat," katanya disambut gelak ketawa orang ramai..